



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

06.11.2020թ.

Ո Ր Ո Շ ՈՒ Մ

ՀՀ գնումների հետ կապված բողոքներ քննող անձի թիվ ԱՑ-ՆԳ-2020/234

Հայաստանի Հանրապետության գնումների հետ կապված բողոքներ քննող անձը՝
ի դեմս Գրիգոր Ներսիսյանի,

Մասնակցությամբ՝ «Ռոյալթուր ինվեստ» ՍՊԸ-ի ներկայացուցիչ

Հ. Ենգոյանի (լիազորագիր տրված՝ 03.11.2020թ.),

ուսումնասիրելով Հայաստանի Հանրապետության ֆինանսների նախարարության
27.10.2020թ. թիվ 26/26-1/16233-2020 գրությամբ «Ռոյալթուր ինվեստ» ՍՊԸ-ին
գնումների գործընթացին մասնակցելու իրավունք չունեցող մասնակիցների ցուցակում
ներառելու նպատակով նախաձեռնված ընթացակարգով ներկայացված հիմքերը,
պարզեցի հետևյալը.

1. ՀՀ ֆինանսների նախարարության ներկայացրած փաստերը և պահանջը.

ՀՀ ֆինանսների նախարարությունը ՀՀ ոստիկանության 23.10.2020թ. թիվ 3//47315-
20 գրության հիման վրա 27.10.2020թ. թիվ 26/26-1/16233-2020 գրությամբ նախաձեռնել է
«Ռոյալթուր ինվեստ» ՍՊԸ-ին (հետայսու նաև՝ Ընկերություն) գնումների գործընթացին
մասնակցելու իրավունք չունեցող մասնակիցների ցուցակում ներառելու ընթացակարգ:

2. «Ռոյալջուր ինվեստ» ՍՊԸ-ի ներկայացրած փաստարկները և դիրքորոշումը.

«Ռոյալջուր ինվեստ» ՍՊԸ-ն Գնումների հետ կապված բողոքներ քննող անձին ուղղված գրությանը հայտնել է հետևյալը.

««Ռոյալջուր ինվեստ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված թիվ ՍՑ-ՆԳ-2020/234 ընթացակարգի հիմքերի վերաբերյալ ներկայացվում են հետևյալ նկատառումները.

«Ռոյալջուր ինվեստ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված թիվ ՍՑ-ՆԳ-2020/234 ընթացակարգը նախաձեռնելու համար հիմք է հանդիսացել ՀՀ Ո ԳՀԱՊՁԲ-ԿԱ/ՏԵԽ/2020/Հ-13 ծածկագրով գնանշման հարցման ընթացակարգի գնահատող հանձնաժողովի 21.10.2020թ. նիստի թիվ 6 արձանագրության 1-ին կետով կայացրած որոշումը առ այն, որ «Ռոյալջուր ինվեստ» ՍՊԸ-ն զրկվել է պայմանագիր կնքելու իրավունքից՝ սահմանված ժամկետում ստորագրված պայմանագիրը չներկայացնելու և շնորհումը չընդունելու հիմքով:

Գտնում ենք, որ գնահատող հանձնաժողովի 21.10.2020թ. նիստի թիվ 6 արձանագրության 1-ին կետով կայացրած որոշումը իրավաչափ չէ հետևյալ հիմնավորմամբ.

ՀՀ ոստիկանության կարիքների համար հայտարարվել է ՀՀ Ո ԳՀԱՊՁԲ-ԿԱ/ՏԵԽ/2020/Հ-13 ծածկագրով գնանշման հարցման ընթացակարգ:

Ընթացակարգի 2-րդ չափաբաժնի մասով պահանջվել է՝ Անխափան սնուցման աղբյուր:

Վերը նշված ընթացակարգին, ի թիվս այլ ընկերությունների, մասնակցության հայտ է ներկայացրել նաև «Ռոյալջուր ինվեստ» ՍՊԸ-ն և ճանաչվել ընտրված մասնակից՝ 2-րդ չափաբաժնի մասով:

Ս. թ. հոկտեմբերի 5-ին «ՀՀ Ո ԳՀԱՊՁԲ-ԿԱ/ՏԵԽ/2020/Հ-13» ծածկագրով գնանշման հարցման ընթացակարգի գնահատող հանձնաժողովի կողմից «Ռոյալջուր ինվեստ» ՍՊԸ-ի էլ. հասցեին է ուղարկվել «ՀՀ Ո ԳՀԱՊՁԲ-ԿԱ/ՏԵԽ/2020/Հ-13-2» ծածկագրով պայմանագրի նախագիծը՝ Ընթացակարգի 2-րդ չափաբաժնի մասով:

Այնուհետև, Պատվիրատուի հետ քննարկման արդյունքում պարզվել է, որ Ընթացակարգի 2-րդ չափաբաժնի մասով հրավերի տեխնիկական բնութագրով

պահանջված «Անխափան սնուցման աղբյուր» ասելով, Պատվիրատուն նկատի է ունեցել բացառապես UPS սարքեր: Մինչդեռ «Ռոյալջուր ինվեստ» ՍՊԸ-ի կողմից հայտով ներկայացված Հավելված 1-ով առաջարկվել է հետևյալ ապրանք հետևյալ ապրանքանիշով՝ Անխափան սնուցման աղբյուր, Վիետնամական, Wbr gr 1272/28w, որը հանդիսանում է ոչ թե UPS, այլ մարտկոց:

Պայմանագրի կնքման փուլում Պատվիրատուն հայտնել է, որ տվյալ Ընթացակարգի 2-րդ չափաբաժինը հայտարարվել է բացառապես UPS սարքի ձեռքբերման նպատակով և եթե պայմանագիրը կնքելու փուլում «Ռոյալջուր ինվեստ» ՍՊԸ-ի կողմից մատակարարվի հայտով ներկայացրած Վիետնամական մարտկոց հետևյալ տեխնիկական բնութագրի՝ Wbr gr 1272/28w, ապա նշված ապրանքը չի ընդունվի Պատվիրատուի կողմից՝ մարտկոց հանդիսանալու պատճառով:

Այդ իսկ պատճառով վերոհիշյալ իրավիճակի վերաբերյալ իրավական գնահատական ստանալու համար «Ռոյալջուր ինվեստ» ՍՊԸ-ն համապատասխան բողոքով դիմել է դեռևս 09.10.2020թ., սակայն սխալմամբ այն հասցեագրել է ՀՀ ֆինանսների նախարարությանը, այլ ոչ թե գնումների հետ կապված բողոքներ քննող անձին:

Վերջնական շտկված բողոքը բողոքներ քննող անձ Գ.Ներսիսյանին ներկայացվել է 20.10.2020թ.:

Նշված բողոքի վերաբերյալ հայտարարությունը www.gnumner.am պաշտոնական կայքում հրապարակվել է 21.10.2020թ.:

21.10.2020թ. բողոքարկված ընթացակարգով գնահատող հանձնաժողովի կողմից հրավիրվել է նիստ (նիստի անցկացման ժամ նշված չէ արձանագրությամբ), տվյալ նիստի թիվ 6 արձանագրության (կցվում է) 1-ին կետով «Ռոյալջուր ինվեստ» ՍՊԸ-ն զրկվել է պայմանագիր կնքելու իրավունքից՝ սահմանված ժամկետում ստորագրված պայմանագիրը չներկայացնելու և շնորհումը չընդունելու հիմքով, որից հետո 2-րդ չափաբաժնի մասով առաջին տեղ զբաղեցնող մասնակից է ճանաչվել «Էյչ Գրուպ» ՍՊԸ-ն: Նույն արձանագրությամբ որոշում է կայացվել «Էյչ Գրուպ» ՍՊԸ-ին 26.10.2020թ. հրավիրել բանակցությունների:

Այնուհետև ընթացակարգի գնահատող հանձնաժողովի 26.10.2020թ. հրավիրված նիստի թիվ 7 արձանագրությամբ (կցվում է) արձանարվել է, որ «Էյչ Գրուպ» ՍՊԸ-ն չի ներկայացել գների նվազեցման շուրջ բանակցությունների, և որոշում է կայացվել 1-ին

տեղ գբաղեցնող մասնակից ճանաչել «Նորմա-պլյուս» ՍՊԸ-ին և վերջինիս հրավիրել բանակցությունների:

Այնուհետև ընթացակարգի գնահատող հանձնաժողովի 28.10.2020թ. հրավիրված նիստի թիվ 8 արձանագրությամբ (կցվում է), հիմք ընդունելով, որ «Նորմա-պլյուս» ՍՊԸ-ն չի ներկայացել բանակցությունների, որոշում է կայացվել Ընթացակարգի 2-րդ չափաբաժինը հայտարարել չկայացած:

Չափաբաժին	Գնման առարկայի համառոտ նկարագրություն	Գնման ընթացակարգի մասնակիցների անվանումները՝ այդպիսիք լինելու դեպքում	Գնման ընթացակարգը չկայացած է հայտարարվել համաձայն՝ «Գնումների մասին» ՀՀ օրենքի 37-րդ հոդվածի 1-ին մասի /ընդգծել համապատասխան տողը/	Գնման ընթացակարգը չկայացած հայտարարելու հիմնավորման վերաբերյալ համառոտ տեղեկատվություն
2	անխափան սնուցման աղբյուրներ	«Նորմա-պլյուս» ՍՊԸ «Էյչ Գրուպ» ՍՊԸ	4-րդ կետի	Գները գերազանցել են նախահաշվային գինը

Հարգելի պարոն Ներսիսյան, գտնում ենք, որ սույն գործողությունների արդյունքում ՀՀ Ո ԳՀԱՊԶԲ-ԿԱ/ՏԵԽ/2020/Հ-13 ծածկագրով գնահատող հանձնաժողովի կողմից թույլ են տրվել գնումների մասին ՀՀ օրենսդրության հետևյալ խախտումները:

Մասնավորապես, ըստ www.gnumner.am կայքում հրապարակված տեղեկատվության՝ «Ռոյալջուր Ինվեստ» ՍՊԸ-ն 20.10.2020թ. ներկայացված շտկված բողոքը և դրա վերաբերյալ հայտարարությունը կայքում հրապարակվել է 21.10.2020թ.: Մինչդեռ, գնահատող հանձնաժողովը այդ հայտարարությունը կայքում հրապարակելուց հետո այնուամենայնիվ կատարել է գործողություններ Ընթացակարգի հենց այդ չափաբաժնի մասով՝ հապատասխանաբար նիստեր հրավիրելով 21.10.2020թ., 26.10.2020թ. և 28.10.2020թ.:

Մինչդեռ «Գնումների մասին» ՀՀ օրենքի (այսուհետ նաև՝ Օրենք) 50-րդ հոդվածի 3-րդ մասի համաձայն՝ եթե բողոքը չի բավարարում սույն հոդվածի պահանջները, ապա բողոքն ստանալուն հաջորդող երկու աշխատանքային օրվա ընթացքում գնումների հետ կապված բողոքներ քննող անձն այդ մասին գրավոր տեղեկացնում է բողոքը ներկայացրած անձին՝ նրան տալով արձանագրված թերությունները վերացնելու երկու աշխատանքային օր ժամկետ: Ընդ որում, եթե սույն հոդվածի 2-րդ մասի 2-րդ կետով

սահմանված ժամկետում ներկայացված բողոքը չի բավարարել սույն հոդվածի պահանջները, ապա սույն մասով սահմանված ժամկետում շտկված և գնումների հետ կապված բողոքներ քննող անձին ներկայացված բողոքը համարվում է սահմանված ժամկետում ներկայացված:

Օրենքի 51-րդ հոդվածի 1-ին մասի համաձայն՝ գնումների հետ կապված բողոքներ քննող անձին ներկայացված բողոքն ինքնաբերաբար կասեցնում է գնման գործընթացը՝ սույն օրենքի 50-րդ հոդվածի 9-րդ մասով նախատեսված հայտարարությունը հրապարակվելու օրվանից մինչև բողոքի քննության արդյունքներով ընդունված որոշման՝ ուժի մեջ մտնելու օրը:

Այսինսով, վերոհիշյալ փաստերը վկայում են, որ գնահատող հանձնաժողովը կատարել է մի շարք գործողություններ Օրենքի 51-րդ հոդվածի 1-ին մասի համաձայն արդեն իսկ կասեցված Ընթացակարգով, ինչը ոչ իրավաչափ է:

Ավելին, պայմանագրի կնքման համար սահմանված ժամկետում «Ռոյալտուր Ինվեստ» ՍՊԸ-ն ներկայացրել է բողոք, որով վիճարկվել է պայմանագրի կնքելու գործընթացը, սակայն անկախ առկա բողոքից, Ընթացակարգի գնահատող հանձնաժողովը որոշում է կայացրել զրկել ՍՊԸ-ին պայմանագրի կնքելու իրավունքից՝ սահմանված ժամկետում կնքված պայմանագիրը չներկայացնելու հիմքով, մինչդեռ Օրենքի 50-րդ հոդվածի 3-րդ մասը իմպերատիվ սահմանում է, որ սահմանված ժամկետում շտկված և գնումների հետ կապված բողոքներ քննող անձին ներկայացված բողոքը համարվում է սահմանված ժամկետում ներկայացված: Այլ կերպ ասած, շտկված և 20.10.2020թ. ներկայացրած բողոքը պետք է կասեցնեք պայմանագրի կնքելու գործընթացը (06.10.2020թ. մինչև 19.10.2020թ. ներառյալ), ինչը տվյալ դեպքում չի կատարվել:

Վերոհիշյալի արդյունքում գնահատող հանձնաժողովի կողմից խախտվել է «Գնումների մասին» ՀՀ օրենքի 50-րդ հոդվածի 3-րդ հոդվածի և 51-րդ հոդվածի 1-ին մասի պահանջները:

Գտնում ենք, որ նման պայմաններում գնահատող հանձնաժողովի 21.10.2020թ. նիստի թիվ 6 արձանագրության 1-ին կետով կայացրած որոշումը՝ «Ռոյալտուր Ինվեստ» ՍՊԸ-ին պայմանագրի կնքելու իրավունքից զրկելու մասով իրավաչափ չէ, քանի որ այն հակասում է Օրենքի 51-րդ հոդվածի 1-ին մասի պահանջներին:

Բողոքներ քննող անձին խնդրում ենք նկատի ունենալ, որ 20.10.2020թ. ներկայացված բողոքով և այնուհետև բողոքի լրացումով «Ռոյալտուր Ինվեստ» ՍՊԸ-ն

վիճարկել է պայմանագիր կնքելու գործընթացը, և համապատասխանաբար դրա ժամկետը պետք է կասեցվեր, ինչը տեղի չի ունեցել, իսկ «Ռոյալջուր Ինվեստ» ՍՊԸ-ն ոչ իրավաչափորեն զրկվել է պայմանագիր կնքելու իրավունքից:

Գտնում ենք, որ «Ռոյալջուր Ինվեստ» ՍՊԸ-ի կողմից բողոքի վերաբերյալ որոշում կայացնելուց հետո (հաշվի առնելով, որ բողոքարկումը պետք է կասեցրած լիներ պայմանագիր կնքելու գործընթացը) ՍՊԸ-ն պետք է ունենար հնարավորություն ստորագրել և Պատվիրատուին ներկայացնել ՀՀ Ո ԳՀԱՊՁԲ-ԿԱ/ՏԵԽ/2020/Հ-13-2 ծածկագրով պայմանագիրը, սակայն գնահատող հանձնաժողովի 21.10.2020թ. կայացրած որոշմամբ ՍՊԸ-ն զրկվել է այդ իրավունքից:

Գտնում ենք, որ նման ոչ իրավաչափ որոշումը չի կարող հանգեցնել «Ռոյալջուր Ինվեստ» ՍՊԸ-ին «Գնումների գործընթացին մասնակցելու իրավունք չունեցող մասնակիցների ցուցակում» ներառելուն»:

Ամփոփելով վերոգրյալը՝ Ընկերությունը խնդրել է «Ռոյալջուր Ինվեստ» ՍՊԸ-ին չվերագրել «Գնումների մասին» ՀՀ օրենքի 6-րդ հոդվածի 1-ին մասի 6-րդ կետով նախատեսված որևիցե խախտում և վերջինիսի չներառել «Գնումների գործընթացին մասնակցելու իրավունք չունեցող մասնակիցների ցուցակում»:

«Ռոյալջուր Ինվեստ» ՍՊԸ-ն, պատշաճ ծանուցված լինելով ՍՅ-ՆԳ-2020/234 ընթացակարգի շրջանակներում 06.11.2020թ. ժամը 10:00-ին հրավիրված նիստի վերաբերյալ, ապահովել է իր ներկայացուցչի մասնակցությունը, ով հայտնել է վերոհիշյալ գրությամբ ներկայացված դիրքորոշումը:

3. ՀՀ ոստիկանության կողմից ներկայացված փաստարկները և դիրքորոշումը.

ՀՀ ոստիկանությունը (հետայսու նաև՝ Պատվիրատու) ՀՀ ֆինանսների նախարարությանն ուղղված 23.10.2020թ. թիվ 3//47315-20 գրությամբ հայտնել է, որ Հայաստանի Հանրապետության կառավարության 2017 թվականի մայիսի 04-ի N 526-Ն որոշման 1-ին կետով հաստատված կարգի 45-րդ կետի համաձայն՝ ուղարկում է ՀՀ Ո ԳՀԱՊՁԲ-ԿԱ-ՏԵԽ/2020/Հ-13 ծածկագրով գնման ընթացակարգին հայտ ներկայացրած «Ռոյալջուր Ինվեստ» ՍՊԸ-ի տվյալները՝ համապատասխան հիմքերով, գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ նախաձեռնելու նպատակով:

Պատվիրատուն, պատշաճ ծանուցված լինելով ՍՑ-ՆԳ-2020/234 ընթացակարգի շրջանակներում 06.11.2020թ. ժամը 10:00-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

4. ՍՑ-ՆԳ-2020/234 ընթացակարգի քննության համար էական նշանակություն ունեցող փաստերը.

ՍՑ-ՆԳ-2020/234 ընթացակարգի քննության համար էական նշանակություն ունեն հետևյալ փաստերը.

1. ՀՀ ոստիկանության կողմից հայտարարվել է ՀՀ Ո ԳՀԱՊՁԲ-ԿԱ/ՏԵԽ/2020/Հ-13 ծածկագրով գնանշման հարցման ընթացակարգ (հետայսու նաև՝ Ընթացակարգ), որին մասնակցելու նպատակով հայտ է ներկայացրել «Ռոյալթուր ինվեստ» ՍՊԸ-ն:

2. Ընթացակարգի գնահատող հանձնաժողովի 24.09.2020թ. նիստի թիվ 5 արձանագրության համաձայն՝ «Ռոյալթուր ինվեստ» ՍՊԸ-ն Ընթացակարգի 2-րդ չափաբաժնի մասով ճանաչվել է ընտրված մասնակից և որոշվել է Օրենքի 10-րդ հոդվածի 3-րդ մասով սահմանված անգործության ժամկետի ավարտից հետո վերջինիս ներկայացնել պայմանագիր կնքելու առաջարկ:

3. «Ռոյալթուր ինվեստ» ՍՊԸ-ի կողմից 20.10.2020թ. Գնումների հետ կապված բողոքներ քննող անձին ներկայացվել է բողոք, որի վերաբերյալ հայտարարությունը 21.10.2020թ. հրապարակվել է www.procurement.am հասցեով գործող ինտերնետային կայքում:

4. Ընթացակարգի գնահատող հանձնաժողովի 21.10.2020թ. նիստի թիվ 6 արձանագրության համաձայն՝ «Ռոյալթուր ինվեստ» ՍՊԸ-ն զրկվել է պայմանագիրը կնքելու իրավունքից՝ սահմանված ժամկետում ստորագրված պայմանագիրը չներկայացնելու և շնորհումը չընդունելու հիմքով, այնուհետև 2-րդ չափաբաժնի մասով առաջին տեղ զբաղեցրած մասնակից է ճանաչվել «Էյչ Գրուպ» ՍՊԸ-ն:

5. Ընթացակարգի գնահատող հանձնաժողովի 26.10.2020թ. նիստի թիվ 7 արձանագրությամբ արձանագրվել է, որ «Էյչ Գրուպ» ՍՊԸ-ն չի ներկայացել գների նվազեցման շուրջ բանակցության, որի արդյունքում որոշվել է առաջին տեղ զբաղեցրած մասնակից ճանաչել «Նորմա Պլյուս» ՍՊԸ-ին և վերջինիս 28.10.2020թ. հրավիրել բանակցության:

6. Ընթացակարգի գնահատող հանձնաժողովի 28.10.2020թ. նիստի թիվ 8 արձանագրությամբ արձանագրվել է, որ «Նորմա Պլյուս» ՍՊԸ-ն չի ներկայացել բանակցության և որոշում է կայացվել Ընթացակարգը հայտարարել չկայացած:

5. ՀՀ գնումների հետ կապված բողոքներ քննող անձի հիմնավորումները և եզրահանգումը.

ՀՀ գնումների հետ կապված բողոքներ քննող անձ Գրիգոր Ներսիսյանս, ուսումնասիրելով ՀՀ ֆինանսների նախարարության 27.10.2020թ. թիվ 26/26-1/16233-2020 գրությունը, ՀՀ ոստիկանության 23.10.2020թ. թիվ 3//47315-20 գրությունը և «Ռոյալթյուր ինվեստ» ՍՊԸ-ի 04.11.2020թ. գրությունը, հայտնում եմ հետևյալը.

«Գնումների մասին» ՀՀ օրենքի (հետայսու նաև՝ Օրենք) 6-րդ հոդվածի 1-ին մասի 6-րդ կետի համաձայն՝ բացառությամբ նույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Օրենքի 6-րդ հոդվածի 2-րդ մասը սահմանում է, որ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում գնումների հետ կապված բողոքներ քննող մարմնում՝ առանց վճարի: Տվյալ մասնակցի կարծիքը լսելուց հետո գնումների հետ կապված բողոքներ քննող անձը սույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին սույն հոդվածով

նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Այսպես՝ ՀՀ ոստիկանության կողմից հայտարարվել է ՀՀ Ո ԳՀԱՊՁԲ-ԿԱ/ՏԵԽ/2020/Հ-13 ծածկագրով գնանշման հարցման ընթացակարգ, որին մասնակցելու նպատակով հայտ է ներկայացրել «Ռոյալթուր ինվեստ» ՍՊԸ-ն:

Ընթացակարգի գնահատող հանձնաժողովի 24.09.2020թ. նիստի թիվ 5 արձանագրության համաձայն՝ «Ռոյալթուր ինվեստ» ՍՊԸ-ն Ընթացակարգի 2-րդ չափաբաժնի մասով ճանաչվել է ընտրված մասնակից և որոշվել է Օրենքի 10-րդ հոդվածի 3-րդ մասով սահմանված անգործության ժամկետի ավարտից հետո վերջինիս ներկայացնել պայմանագիր կնքելու առաջարկ:

«Ռոյալթուր ինվեստ» ՍՊԸ-ի կողմից 20.10.2020թ. Գնումների հետ կապված բողոքներ քննող անձին ներկայացվել է բողոք, որի վերաբերյալ հայտարարությունը 21.10.2020թ. հրապարակվել է www.procurement.am հասցեով գործող ինտերնետային կայքում:

Ընթացակարգի գնահատող հանձնաժողովը, 21.10.2020թ. շարունակելով իր աշխատանքը, նիստի թիվ 6 արձանագրությամբ արձանագրել է, որ «Ռոյալթուր ինվեստ» ՍՊԸ-ն զրկվել է պայմանագիրը կնքելու իրավունքից՝ սահմանված ժամկետում ստորագրված պայմանագիրը չներկայացնելու և շնորհումը չընդունելու հիմքով, այնուհետև 2-րդ չափաբաժնի մասով առաջին տեղ զբաղեցրած մասնակից է ճանաչել «Էյչ Գրուպ» ՍՊԸ-ին:

Այնուհետև Ընթացակարգի գնահատող հանձնաժողովը 26.10.2020թ. նիստի թիվ 7 արձանագրությամբ արձանագրել է, որ «Էյչ Գրուպ» ՍՊԸ-ն չի ներկայացել գների նվազեցման շուրջ բանակցության, որի արդյունքում որոշվել է առաջին տեղ զբաղեցրած մասնակից ճանաչել «Նորմա Պլուս» ՍՊԸ-ին և վերջինիս 28.10.2020թ. հրավիրել բանակցության:

Ընթացակարգի գնահատող հանձնաժողովը 28.10.2020թ. նիստի թիվ 8 արձանագրությամբ արձանագրել է, որ «Նորմա Պլուս» ՍՊԸ-ն չի ներկայացել բանակցության և որոշում է կայացվել Ընթացակարգը հայտարարել չկայացած:

Այսպիսով՝ ուսումնասիրելով ՀՀ Ո ԳՀԱՊՁԲ-ԿԱ-ՏԵԽ/2020/Հ-13 ծածկագրով գնանշման հարցման ընթացակարգը, Ընթացակարգի գնահատող հանձնաժողովի և քարտուղարի գործողությունները՝ արձանագրում են հետևյալը.

Օրենքի 16-րդ հոդվածի 3-րդ և 4-րդ մասերի համաձայն՝

3. Պատվիրատուի ղեկավարը սահմանում է գնումների համակարգող, որը՝

1) պատասխանատու է պատվիրատուի՝ գնումների գործընթացի կազմակերպման և համակարգման համար.

2) եզրակացություն է տալիս գնումների շրջանակներում պատվիրատուի հաստատած փաստաթղթերի վերաբերյալ.

3) իրականացնում է գնահատող հանձնաժողովի քարտուղարի լիազորությունները.

4) կազմում և պատվիրատուի ղեկավարի հաստատմանն է ներկայացնում տվյալ գնման ընթացակարգի արձանագրությունը և պայմանագիրը:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի (հետայսու՝ նաև՝ Կարգ) 5-րդ կետի 1-ին ենթակետի համաձայն՝ յուրաքանչյուր **գնման գործընթացի համար պատասխանատու են** պատվիրատուի ղեկավարը, ինչպես նաև **իրենց վերապահված իրավասությունների մասով՝ գնումները համակարգողը:**

Կարգի 26-րդ կետի 5-րդ ենթակետով սահմանվում է, որ Գնահատող հանձնաժողովի՝ նիստերը տեսաձայնագրվում կամ ձայնագրվում և արձանագրվում են, և **յուրաքանչյուր նիստի արդյունքում** նիստին ներկա հանձնաժողովի անդամները և **քարտուղարը պարտադիր կարգով ստորագրում են այդ նիստի արձանագրությունը:** Արձանագրությունը գնման ընթացակարգի արձանագրության անբաժանելի մասն է.:

Օրենքի 51-րդ հոդվածի 1-ին մասի համաձայն՝ **գնումների հետ կապված բողոքներ քննող անձին ներկայացված բողոքն ինքնաբերաբար կասեցնում է գնման գործընթացը՝ սույն օրենքի 50-րդ հոդվածի 9-րդ մասով նախատեսված հայտարարությունը հրապարակվելու օրվանից մինչև բողոքի քննության արդյունքներով ընդունված որոշման՝ ուժի մեջ մտնելու օրը:**

Վերոհիշյալ նորմերի վերլուծությունը ցույց է տալիս, որ հաշվի առնելով գնման գործընթացի կարևորությունը, ինչպես նաև ոչ միայն պատվիրատուի, այլև նաև մասնակիցների «Գնումների մասին» ՀՀ օրենքով երաշխավորված իրավունքներն ապահովելու անհրաժեշտությունը, օրենսդիրը սահմանել է գնման ընթացակարգը կազմակերպելու հստակ գործընթաց, նախատեսելով գնման գործընթացի համար պատասխանատուներին, վերջիններիս գործառույթները և գնման գործընթացը կազմակերպելու պայմանները:

Այսպիսով՝ արձանագրում եմ, որ «Ռոյալտյուր ինվեստ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու

նպատակով նախաձեռնված թիվ ՍՑ-ՆԳ-2020/234 ընթացակարգը նախաձեռնելու համար հիմք է հանդիսացել ՀՀ Ո ԳՀԱՊՁԲ-ԿԱ/ՏԵԽ/2020/Հ-13 ծածկագրով գնանշման հարցման ընթացակարգի գնահատող հանձնաժողովի 21.10.2020թ. նիստի թիվ 6 արձանագրությամբ կայացրած որոշումը այն է՝ «Ռոյալտուր ինվեստ» ՍՊԸ-ն զրկվել է պայմանագիր կնքելու իրավունքից՝ սահմանված ժամկետում ստորագրված պայմանագիրը չներկայացնելու և շնորհումը չընդունելու հիմքով:

Մինչդեռ արձանագրում եմ, որ նույն գնման ընթացակարգի շրջանակներում «Ռոյալտուր ինվեստ» ՍՊԸ-ի կողմից 20.10.2020թ. Գնումների հետ կապված բողոքներ քննող անձին ներկայացվել է բողոք, որի վերաբերյալ հայտարարությունը 21.10.2020թ. հրապարակվել է www.procurement.am հասցեով գործող ինտերնետային կայքում և Օրենքի 51-րդ հոդվածի 1-ին մասի համաձայն գնման գործընթացը ինքնաբերաբար համարվել է կասեցված Օրենքի 50-րդ հոդվածի 9-րդ մասով նախատեսված հայտարարությունը հրապարակվելու օրվանից մինչև բողոքի քննության արդյունքներով ընդունված որոշման ուժի մեջ մտնելու օրը, սակայն Ընթացակարգի գնահատող հանձնաժողովը, խախտելով Օրենքի 51-րդ հոդվածի 1-ին մասով սահմանված պահանջը, արդեն իսկ 21.10.2020թ. կասեցված Ընթացակարգով, շարունակելով գնման գործընթացը, 21.10.2020թ., 26.10.2020թ. և 28.10.2020թ. հրավիրել է նիստեր և արդյունքում՝ Կարգի 45-րդ կետի համաձայն՝ ՀՀ ֆինանսների նախարարություն է ներկայացրել ՀՀ Ո ԳՀԱՊՁԲ-ԿԱ-ՏԵԽ/2020/Հ-13 ծածկագրով գնման ընթացակարգին հայտ ներկայացրած «Ռոյալտուր ինվեստ» ՍՊԸ-ի տվյալները՝ համապատասխան հիմքերով, գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ նախաձեռնելու նպատակով:

Նման պայմաններում գտնում եմ, որ 21.10.2020թ. կասեցված Ընթացակարգի պայմաններում տվյալ Ընթացակարգով իրականացված հետագա բոլոր գործողությունները և կայացված որոշումները իրավաչափ չեն, քանի որ իրականացվել են Օրենքի 51-րդ հոդվածի 1-ին մասի պահանջների խախտմամբ:

Միաժամանակ, ուսումնասիրելով Ընթացակարգի գնահատող հանձնաժողովի 21.10.2020թ. նիստի թիվ 6 արձանագրությունը, համաձայն որի «Ռոյալտուր ինվեստ» ՍՊԸ-ն զրկվել է պայմանագիրը կնքելու իրավունքից, որը հիմք է հանդիսացել Ընթացակարգ նախաձեռնելու համար, արձանագրում եմ, որ բացակայում է ՀՀ Ո ԳՀԱՊՁԲ-ԿԱ-ՏԵԽ/2020/Հ-13 ծածկագրով գնման գործընթացի կազմակերպման պատասխանատուի՝ գնումները համակարգողի (հանձնաժողովի քարտուղարի)

ստորագրությունը, մինչդեռ Կարգի 26-րդ կետի 5-րդ ենթակետով հստակ սահմանվում է, որ գնահատող հանձնաժողովի յուրաքանչյուր նիստի արդյունքում **քարտուղարը պարտադիր կարգով ստորագրում է այդ նիստի արձանագրությունը**, որը գնման ընթացակարգի արձանագրության անբաժանելի մասն է:

Այսպիսով՝ հաշվի առնելով այն փաստական հանգամանքը, որ «Ռոյալտուր ինվեստ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ նախաձեռնելու հիմքերը Պատվիրատուի կողմից ՀՀ ֆինանսների նախարարություն է ուղարկվել վերը նշված իրավակարգավորումների խախտմամբ, հետևաբար գտնում եմ, որ ոչ իրավաչափ ընթացակարգից բխող բացասական հետևանքները չեն կարող մեկնաբանվել ի վնաս Ընկերության, ուստիև հնարավոր չէ արձանագրել «Ռոյալտուր ինվեստ» ՍՊԸ-ի կողմից Օրենքի 6-րդ հոդվածի 1-ին մասի 6-րդ կետի «բ» ենթակետով նախատեսված պարտավորության խախտման փաստը, հետևաբար գտնում եմ, որ վերջինիս գնումների գործընթացին մասնակցելու իրավունք չունեցող մասնակիցների ցուցակում ներառելու հիմքեր առկա չեն:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 2-րդ կետով՝

Ո Ր Ո Շ Ե Ց Ի

Հայաստանի Հանրապետության ֆինանսների նախարարության 27.10.2020թ. թիվ 26/26-1/126233-2020 գրությամբ «Ռոյալտուր ինվեստ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը մերժել:

ՀՀ գնումների հետ կապված բողոքներ քննող անձի որոշումն իրավապարտադիր է և ուժի մեջ է մտնում տեղեկագրում հրապարակվելու հաջորդ օրը:

ՀՀ գնումների հետ կապված բողոքներ քննող անձի որոշումը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

Գնումների հետ կապված
բողոքներ քննող անձ՝



ԳՐԻԳՈՐ ՆԵՐՍԻՍՅԱՆ